

# Vun driweriwer

---

erscheint auf [www.lenauheim.de](http://www.lenauheim.de)

monatliche  
Erscheinung

Oktober 2012

von *Helen Alba*

## Die gnädich Hewamin

Frieher hats uf alli Derfer e Hewamin gin. Awer ach e Sanitatersch war zur Stell. Nit jedes Dorf hat e Dokter ghat. Kiner sin selmols jo meh wie heutzutach uf die Welt kumm un die Hewamin hat alli Händ voll zu tun ghat. An unser Bogaroscher Hewamin kann ich mich gut erinnre. Die Bäsl Bawi is immer mit eener aldi Ledertaschn im Dorf rum geloff, in dere war ihre Werkzeich verstaute. Sie hat die werdendi Mutter schun vor der Geburt unersucht, hat während der Geburt ihre Beschetes gemacht un noher a die Mutter im Kindbett versorcht.

In dem Summer war die Enkelin vun dere Bäsl Bawi, die wu schun langi Johre in Deitschland lebt, zu Buch do. Ich han se uf Bogarosch begleitet, mir sin erscht uf de Kerchhof un am Grab vun ihrer Oma, schaut des Weib uf dere ihre Bild ufm Kreiz, schmaichelt driwer un verzählt: „Die Oma war e herzensgutes Weib. Mei Vater is im Zweite Weltkrieche verscholl, wie ich een Jahr alt war. So han mir drei Weiwer, Oma, Mutter un ich, leenich gewohnt. Un wanns soweit war, dass de Storch angekloppt hat, is schnell eener kumm, for die Oma rufe. Wanns mitte in der Nacht war, is ans Finschter gekloppt gin, die Oma is schnell in de Rock gschluppt, hat ihre Taschn derwischt un is je. Manchmol hats stundelang gedauert, bis se wieder kumm is un an ihrem lächelnde Gesicht han mer gsiehn, dass alles gut abgeloff is. Wie anfangs der 50er Johre die Leit uf de Baragan verschleppt gin sin, selmols sin dann die erschte Koloniste ins Dorf kumm. Uner ihne auch Pokaite, die jo vill Kiner ghat han. Meischt is dann ens vun de Kiner kloppe kumm un hat gschrie: `Gnädichi Hewamin, schnell, schnell!` Die Leit han selmols wenich Geld ghat. Doch immer is die Oma mit em gfillte Zecker hem kumm. Mol war e Hingl drin, e anres Mol frisch Gschlachtnes, e Range Schungefleisch – was mer halt so ghat hat im Haus.“

Ja, so war des selmols. Die Bäsl Bawi hat a meiner Mutter beigstann, wie ich uf die Welt kumm sin. Mer hat mer später verzählt, dass mich gar kenner in owacht ghol hat. Ich sin in die Wie kumm un han schreie kenne. Weils meiner Mutter gar nit gut gang is, han sich alli nor um sie gekimmert. Doch alles is gut ausgang, was mit Sicherheit ach e Verdienscht der Hewamin war!

## Eisberch vum Flieger aus gsiehn!

Unlängscht han ich mol wieder im Flieger ghuckt un sin geger des Deitschland gfloo. Bis Wien war alles scheen un gut. Dorte han ich zwischelande misse un es war e gudi Stund lang Zeit, mich zu orientiere. Vun Temeschwar han ich schun zwaa Bordkarte kriet. Mit eener sin ich in Temeschwar in de Flieger, die anri war for vun Wien weiter geger Stuttgart fliehe. Un uf dere Kart steht angeschrieb, welle Ausgang mer suche muss, for weiter fliehe. Naja, in Temeschwar war des ganz einfach. Doch der Flughafen Wien, der is jo riesengroß un mer muss owacht gin, dass mer sich nit verliert dorte. Ich han halt immer em Buchstab D nohgehn misse, treppauf un trepprunner. Ufmol sin ich an eem Laafband ankumm. Un wie ich gsiehn, dass die Leit sich dorte drufstelle un fiehre losse, han ich des ach so gemacht. Endlich war ich wieder im Flieger, newer mich hat sich e Mann in beschte Johre ghuckt.

Wie mer schun hoch owe in der Luft ware, hat der Mann anfang uf seim Sitz hin un her zu ritsche. Ich denk, der werd doch nit amend Ängschter han? Dernoh is er jedi zweiti Minut zammgezuckt. Wie er anfang hat, mit de Händ zu fuchtle, do wars mer nimi alles ens un ich han ne gfroot, ob em vleicht schlecht is. Doch der Mann hat mich gar nit in owacht ghol.

Iwerdem is die Bedienung mitm Wägelche angfahr kumm un die Stewardess hat gsiehn, dass do was nit in Ordnung is. Hat dem Mann erscht mol e Kaffee un Wasser ingschenkt. Dernoh war e Weil Ruh. Mer sin iwer de Wolke gfloh un ufmol schreit der Mann: „Dorte, dorte...“ Die Stewardess kummt angerennt, will de Mann beruhiche, doch ufmol hat de Pilot aus seiner Kabin gemeld, dass mer bal in Stuttgart lande were. De Mann schnauft uf un schreit: „Endlich!“ Jetz war Ruh. Wie mer ausgstie sin, hat der Mann sich bei mir entschuldicht: „Wisst der, ich sin immer so unruhich im Flieger un stell mer allerhand vor. Desmol han ich die Wolke uner uns mit eem Eisberch verwechselt!“